

巢氏諸病源候總論卷十九

積聚病諸候

凡六論

積聚候

積聚者由陰陽不和府藏虛弱受於風邪搏於府藏之氣所爲也府者陽也藏者陰也陽浮而動陰沈而伏積者陰氣五藏所生始發不離其部故上下有所窮已聚者陽氣六府所成故無根本上下無所留止其痛無有常處諸藏受邪初未能爲積聚留滯不去乃成積聚肝之積名曰肥氣在左脇下如覆杯有頭足久不愈令人發瘡瘰連歲月不已以夏戊巳得之何以言之肺病傳肝肝當傳脾脾夏適王王者不受邪肝復欲還肺肺不



巢氏諸病源候總論卷十九

積聚病諸候

凡六論

積聚候

積聚者由陰陽不和府藏虛弱受於風邪搏於府藏之氣所爲也府者陽也藏者陰也陽浮而動陰沈而伏積者陰氣五藏所生始發不離其部故上下有所窮已聚者陽氣六府所成故無根本上下無所留止其痛無有常處諸藏受邪初未能爲積聚留滯不去乃成積聚肝之積名曰肥氣在左脇下如覆杯有頭足久不愈令人發瘡瘕連歲月不已以夏戊巳得之何以言之肺病傳肝肝當傳脾脾夏適王王者不受邪肝復欲還肺肺不



肯受故留結爲積故知肥氣以季夏得之也心之積名曰伏梁起臍上如臂上至心下以秋庚辛得之何以言之腎病傳心心當傳肺肺秋適王王者不受邪心欲復還腎腎不肯受故留結爲積故知伏梁以秋得之也脾之積名曰否氣在胃脘覆大如盤久不愈令人四肢不收發黃疸飲食不爲肌膚以冬壬癸得之何以言之肝病傳脾脾當傳腎腎冬適王王者不受邪脾欲復還肝肝不肯受故留結爲積故知否氣以冬得之也肺之積名曰息賁在右脇下覆大如杯久不愈令人洒淅寒熱喘嗽發肺癰以春甲乙得之何以言之心病傳肺肺當傳肝肝以春適王王者不受邪肺欲復還心心不肯受

故留結爲積故知息賁以春得之也腎之積名曰賁狹發於少腹上至心下若狹賁走之狀上下無時久不愈令人喘逆骨萎少氣以夏丙丁得之何以言之脾病傳腎腎當傳心心夏適王王者不受邪腎欲復還脾脾不肯受故留結爲積故知賁狹以夏得之也此五者爲五積也

診其脈駛而緊積聚脈浮而牢積聚脈橫者脇下有積聚脈來小沈實者胃中有積聚不下食食卽吐出脈來細沈附骨者積也脈出在左積在左脈出在右積在右脈兩出積在中央以部處之

診得肺積脈浮而毛按之辟易脇下氣逆背相引痛少



氣善忘目瞋皮膚寒秋愈夏劇主皮中時痛如蝨緣狀其甚如針刺之狀時痒色白也

診得心積脈沈而芤時上下無常處病悸腹中熱面赤咽乾煩掌中熱甚卽唾血主身瘕癰主血厥夏瘥冬劇色赤也

診得脾積脈浮大而長飢則減飽則見臍起與穀爭累累如桃李起見於外腹滿嘔泄腸鳴四肢重足脛腫厥不能臥是主肌肉損色黃也

診得肝積脈弦而細兩脇下痛邪走心下足脛寒脇下引小腹男子積疝也女子病淋也身無膏澤喜轉筋爪甲枯黑春瘥秋劇色青也



診得腎積脈沈而急若脊與腰相引飢則見飽則減病腰痛小腹裏急口乾咽腫傷爛目茫茫骨中寒主髓脈喜忘色黑也

診得心腹積聚其脈牢強急者生脈虛弱急者死又積聚之脈實強者生沈者死其湯熨針石別有正方補養宣導今附於後

養生方導引法云以左足踐右足上除心下積

又云病心下積聚端坐生腰向日仰頭徐以口內氣因而咽之三十過而止開目

又云左脇側臥申臂直脚以口內氣鼻吐之過而復始除積聚心下否鞭



又云以左手按右脇舉右手極形除積及老血

又云閉口微息正坐向王氣張鼻取氣逼置臍下小口微出十二通氣以除結聚低頭不息十二通以消飲食令身輕強行之冬月令人不寒

又云端坐生腰直上展兩臂仰兩手掌以鼻內氣閉之自極七息名曰蜀王喬除脇下積聚

又云向晨去枕正偃臥伸臂脛瞑目閉口不息極張腹兩足再息頃間吸腹仰兩足倍拳欲自微息定復爲春三夏五秋七冬九蕩滌五藏津潤六府所病皆愈腹有病積聚者張吸其腹熱乃止癥瘕散破卽愈矣

積聚癰結候



積聚癰結者是五藏六府之氣已積聚於內重因飲食不節寒溫不調邪氣重沓牢癰盤結者也若久卽成癥

積聚心腹痛候

積者陰氣五藏所生其痛不離其部故上下有所窮已聚者陽氣六府所成故無根本上下無所留止其痛無有常處此皆由寒氣搏於藏府與陰陽氣相擊下上故心腹痛也診其寸口之脈沈而橫脇下有積腹中有橫積聚痛又寸口脈細沈滑者有積聚在脇下左右皆滿與背相引痛

又云寸口脈緊而牢者脇下腹中有橫積結痛而泄利脈微細者生浮者死



積聚心腹脹滿候

積者陰氣五藏所生其痛不離其部故上下有所窮已聚者陽氣六府所成故無根本上下無所留止其痛無有常處也積聚成病蘊結在內則氣行不宣通氣搏於府藏故心腹脹滿心腹脹滿則煩而悶尤短氣也

積聚宿食候

積者陰氣五藏所生其痛不離其部故上下有所窮已聚者陽氣六府所成故無根本上下無所留止其痛無有常處也積聚而宿食不消者由藏府爲寒氣所乘脾胃虛冷故不消化留爲宿食也診其脈來實心腹積聚飲食不消胃中冷也



伏梁候

伏梁者此猶五藏之積一名也心之積名曰伏梁起於臍上大如臂診得心積脈沈而芤時上下無常處病腹中熱而咽乾心煩掌中熱甚卽唾血身瘕癥夏瘥冬劇唾膿血者死又其脈牢強急者生虛弱急者死

癥瘕病諸候

凡十八論

癥候

癥者由寒溫失節致府藏之氣虛弱而食飲不消聚結在內染漸生長塊段盤牢不移動者是癥也言其形狀可徵驗也若積引歲月人卽柴瘦腹轉大遂致死診其脈弦而伏其癥不轉動者必死

癥瘕候

癥瘕者皆由寒溫不調飲食不化與藏氣相搏結所生也其病不動者直名爲癥若病雖有結瘕而可推移者名爲瘕瘕瘕者假也謂虛假可動也候其人發語聲嘶中滿濁而後語乏氣拖舌語而不出此人食結在腹病寒口裏常水出四體洒洒常如發瘧飲食不能常自悶悶而痛此食癥病也診其脈沈而中散者寒食癥也脈弦緊而細瘕也若在心下則寸口脈弦緊在胃脘則關上弦緊在臍則尺中弦緊脈瘕法左手脈橫瘕在左右手脈橫瘕在右脈頭大在上頭小在下脈來逆而牢者爲病瘕也腎脈小急肝脈小急心脈若鼓皆爲瘕寸口



脈結者癥瘕脈弦而伏腹中有癥不可轉動必死不治也

養生方云飲食大走腸胃傷久成癥瘕時時結痛其湯熨針石別有正方補養宣導今附於後

養生方導引法云向晨去枕正偃臥伸臂脛瞑目閉口無息極張腹兩足再息頃間吸腹仰兩足倍拳欲自微息定復爲之春三夏五秋七冬九蕩滌五藏津潤六腑所病皆愈積聚者張吸其腹熱乃止癥瘕散破卽愈矣

暴癥候

暴癥者由腑藏虛弱食生冷之物藏旣虛弱不能消之結聚成塊卒然而起其生無漸名曰暴癥也本由藏弱

其癥暴生至於成病死入則速

鼈癥候

鼈癥者謂腹內癥結如鼈之形狀有食鼈觸冷不消生癥者有食諸雜物得冷不消變化而作者此皆脾胃氣弱而遇冷不能剋消故也癥瘕結成推之不動移是也

蝨癥候

人有多蝨而性好齧之所齧既多府藏虛弱不能消之不幸變化生癥而患者亦少俗云蝨癥人見蝨必齧之不能禁止蝨生長在腹內時有從下部出亦能斃人

米癥候

人有好啞米轉久彌嗜啞之若不得米則胸中清水出



得米水便止米不消化遂生癥結其人常思米不能飲食久則斃

食癥候

有人卒大能食乖其常分因飢值生葱便大食之乃生一肉塊繞畔有口其病則難愈故謂食癥特由不幸致此妖異成癥非飲食生冷過度之病也

腹內有人聲候

夫有人腹內忽有人聲或學人語而相答此乃不幸致生災變非關經絡腑藏冷熱虛實所爲也

髮癥候

有人因食飲內誤有頭髮隨食而入成癥胸喉間如有



蟲上下來去者是也

蛟龍病候

蛟龍病者云三月八月蛟龍子生在芹菜上人食芹菜不幸隨食入人腹變成蛟龍其病之狀發則如癰

瘕病候

瘕病者由寒溫不適飲食不消與藏氣相搏積在腹內結塊瘕痛隨氣移動是也言其虛假不牢故謂之爲瘕也

鼈瘕候

鼈瘕者謂腹中瘕結如鼈狀是也有食鼈觸冷不消而生者亦有食諸雜肉得冷變化而作者皆由脾胃氣虛



弱而遇冷則不能剋消所致瘕言假也謂其有形假而推移也昔曾有人共奴俱患鼈瘕奴在前死遂破其腹得一白鼈仍故活有人乘白馬來看此鼈白馬遂尿隨落鼈上卽縮頭及脚尋以馬尿灌之卽化爲水其主曰吾將瘥矣卽服之果如其言得瘥

養生方云六月勿食澤中水令人成鼈瘕也

魚瘕候

有人胃氣虛弱者食生魚因爲冷氣所搏不能消之結成魚瘕揣之有形狀如魚是也亦有飲陂湖之水誤有小魚入人腹不幸便卽生長亦有形狀如魚也

養生方云魚赤目作鱸食之生瘕



蛇瘕候

人有食蛇不消因腹內生蛇瘕也亦有蛇之精液誤入飲食內亦令病之其狀常若飢而食則不下喉噎塞食至胸內卽吐出其病在腹摸揣亦有蛇狀謂蛇瘕也

肉瘕候

人有病常思肉得肉食訖又思之名爲肉瘕也

酒瘕候

人有性嗜酒飲酒旣多而食穀常少積久漸瘦其病遂常思酒不得酒卽吐多睡不復能食云是胃中有蟲使之然名爲酒瘕也

穀瘕候

